

Indeks jenayah dipengaruhi kategori jenayah baru

U.M 9.1.2008 ms 4

KUALA LUMPUR 8 Jan. - Indeks jenayah sejak 2006 sehingga tahun lalu meningkat bukan disebabkan kenaikan jumlah kes tetapi berikutan langkah polis mewujudkan lima kategori jenayah baru.

Lima kategori baru itu adalah ugutan jenayah, menjatuhkan maruah, pemerasan, merusuh dan mendatangkan kecederaan, sekali gus menjadikan 19 kategori jenayah keseluruhannya.

Berikutan itu ia memperlihatkan peningkatan kadar indeks jenayah 7.12 peratus atau 14,910 kes pada tahun lalu.

Ketua Polis Negara, Tan Sri Musa Hassan berkata, 224,298 kes dilaporkan tahun lalu dengan penurunan dalam empat kategori jenayah utama termasuk kes bunuh (3 peratus), samun bersenjata api (11 peratus) dan kecurian kenderaan (20 peratus).

Menurutnya, samun berkatan tanpa bersenjata api 7,067 kes diikuti rogol (3,177), ugutan jenayah (8,119); mendatangkan kecederaan (6,806); merusuh (2,608); mencabul kehormatan (2,320) dan pemerasan (1,692).

"Kami telah menggariskan beberapa strategi penting antaranya penubuhan jawatankuasa

menghubungkan semua jabatan dalam polis bagi memerangi jenayah.

"Menerusi jawatankuasa itu, segala hal perisikan, operasi dan tindakan jenayah akan diambil secara bersepadu," katanya kepada pemberita di Ibu Pejabat Polis Bukit Aman di sini hari ini.

Terdahulu beliau memberi taklimat berhubung indeks jenayah negara kepada Perdana Menteri, Datuk Seri Abdullah Ahmad Badawi.

Musa memberitahu, polis turut mewujudkan satu rangkaian kerjasama antara polis dan orang awam yang mana sistem itu telah diaplikasikan di Kuala Lumpur, Pulau Pinang, Johor serta sebahagian besar Selangor dan terbukti keberkesannya.

Dalam sistem itu, katanya, Ketua Polis Daerah akan memperkenalkan seorang pegawai polis yang akan bertindak sebagai pegawai perhubungan kepada orang awam.

"Dengan cara ini saya yakin orang ramai dapat mengadu masalah atau memberi sebarang maklumat kepada pegawai perhubungan itu dengan cepat bagi membolehkan polis bertindak pantas," tambahnya.